

COMUNICÂT STAMPE

FIESTE DE PATRIE 2013 A DOLEGNE

ZANON (ARLEF): LA STORIE DAL FRIÛL E JENTRI DAURMAN TAI PROGRAMS DE SCUELE DAL OBLIC

**"Nol coste nuie e i zovins a varan dirit a cognossi la storie de lôr tiere e
cussì si podarà rinfuarcî il sens di identitât"**

Dolegne, ai 7 di Avrîl 2013 - Passe nûfcent agns daspò de bole Imperiâl di Indri IV che in chel lontan 3 di Avrîl dal 1077 e decretà la nassite dal Stât Patriarcjâl, ven a stâi un dai prins esemplis europeans di assemblee rapresentative e un dai sistemis istituzionâi plui stabii e avanzâts dal timp, nancje une rie e je dedicate a chest impuartant fat storic tai libris di test adotâts te scuele dal oblic in Italie.

E al è propit ae "cuestion de storie te scuele" che Lorenzo Zanon, president de ARLeF-Agenzie regionâl pe lenghe furlane, al à decidût di dedicâ il sô discors in ocasion des celebrazions de "Fieste dal Friûl" che a àn vût il lôr moment uficiâl vuê a Dolegne in provincie di Gurize.

"E je une cuistion che mi somee il câs di puartâ ae atenzion di ducj - al spieghè Zanon - e che ben si pee ae ricorence che si celebre vuê, un fat storic impuartant pal popul furlan parcè che al rapresente une ocasion di riflession su la sô specialitât e su la lidrîs dal sô caratar, ma ancje un fat storic decisîf te storie di dutis lis istituzions europeanis".

"Une storie che purtrop - al sotlinie Zanon - te scuele de Republiche Taliane e je ancjemò vuê platade, neade, assent. Nancje une rie e je dedicate a chest impuartant avveniment tai libris di test de scuele dal oblic in Italie. E chest - al zonte il president de ARLeF - al è un fat inmò plui grâf te nestre region".

Il risultât al è che "i nestrîs zovins no àn dirit di cognossi la storie de lôr tiere. Chest al è gravissim dal pont di viste dal principi ma al è ancje une vore grâf parcè che al fâs sfantâ il sens di apartignince, la memorie storiche e, in ultime

analisi, al fâs vignî pocje voie di prudelâ e doprâ il propri patrimoni culturâl, in primis la lenghe. Dut chest al contribuîs a fâ pierdi il sens di identitât".

E duncje Zanon, propit tal paîs di Pieri Çorut , devant a rapresentants istituzionâi e ae int intervignude pe fieste, al à fat la sô propueste.

"Une propueste che e deventarà un impegn de Agenzie tai prossims mê e che e je chê di proponi ai rapresentants istituzionâi che a vignaran elets di metisi adun cui referents dal Uffici scolastic regionâl e cun lis altris realtàs competentis in materie par proviodi l'inseriment tai programs scolastic ancje dal insegnament de storie dal Friûl, lant cussì a colmâ une lacune cetant grande".

Chest passaç impuartant su l'insegnament da la storie non vûl dî però no tignî di cont ancje chel de lenghe. "A son lis dôs musis de stesse medaie", al conferme Zanon, che al ten ancje a sotliniâ che cheste operazion no costarà nancje un euro. "No coventin struments particolârs, o vin bielzà a disposizion opuscui indulà che si spieghe in struc ce che i libris di storie dal Friûl a àn aprofondît sul argoment. A diference dal discors linguistic, che al è une vore plui delicât - al spieghe - no coventin stanziaments e tant timp pe formazion dai insegnants . Par spiegâ cuatri pagjinis di storie e covente dome la buine volontât".

Inmaneade des Provinciis di Udin, Gurize e Pordenon, dal Istitût Ladin Furlan "Pre Checo Placerean", dal Comun di Dolegne e de pro loco locâl la celebrazion uficiâl de Fieste dai 3 di Avrîl si è davuelte chest an te cooperative agricole di Lonzan, cu la partecipazion di Region , ARLeF - Agenzie Regionâl pe Lenghe Furlane, Diocesis di Gurize, Concuardie-Pordenon e Udin, Universitât dal Friûl, Uffici Scolastic Regionâl e Societât Filologjiche Furlane .

Daspò de sante messe par furlan celebrade dai rapresentants des trê Diocesis dal Friûl e compagnade dal coro "UNITRE-Cormons" diret dal mestri Alberto Galliussi e daspò la leture de Bole dal Imperadôr Indrì IV e i salûts des autoritâts la matinade si è concludude cu la premiazion de II edizion dal concurs pes scuelis "Emozions furlanis in viaç pal teritori" (in zonte dute la liste dai vincidôrs e des segnalazions).

Elisabetta Pozzetto

Regione Autonoma Friuli Venezia Giulia
[ARLeF - Agenzie Regionâl pe Lenghe Furlane](#)
Piazza XX Settembre 23
33100 Udine

0039 0432 555724 fax 0432 204158 mob 0039 335 8002058